

subsequenti iudicio, in quo probato per novum examen appellationis gravamine quo ad doctrinam, probanda superest ejusdem præ jam electo in reliquis ad regendam Ecclesiam requisitis præstantia, ut de majori alterutrius ad Parochialis Ecclesiæ gubernium idoneitate sententia ferri possit, cum non continuo, si quis est doctior, is etiam aptior, seu magis idoneus ad id regimen habeatur, vel etiam habendus sit. Quam Sacræ Congregationis sententiam scriptores, et Tribunalia laudarunt. Aliis demum in Diocesisibus laudabilis invaluit consuetudo, ut eadem omnibus quæstiones, iidemque casus proponantur; ac (ne qua detur ansa Cancellario quidquam suo Marte addendi, minuendi, mutandi) ut ipsimet Concurrentes quæ interrogati fuerint, quæque responderint, sua manu perscribant; atque Ordinarii, qui morem hunc longe optimum in examinando tenuere, Sacræ deinde Congregationi etiam quæstiones etiam considerandum reliquerunt, his, qui sic examinati essent, atque postpositi, in posterum, ut solent, appellatibus, indulgentia nec ne statim electi novum ad examen provocatio, nulla gravaminis prærequisita probatione, videretur; cum isti ex actis primi examinis gravamen doctrinæ facile alioquin probare possent; quod alii aliter nimirum examinati probare, nisi secundo seu novo examine, non poterant. Nec defuere alii probitatis ac peritiæ in administrandis diu Ecclesiis laude præstantes, qui monerent, frænum aliquod hujusmodi appellantium licentiæ tandem injiciendum, eorumque jam nimis crebras novum ad examen provocaciones esse reprimendas; quippe quæ vix unquam sine magno Ecclesiarum damno contingunt. Nam cum novum examen coram Juce appellationis longe procul a Parochia peragendum sit, electus ab Episcopo, qui provocatur, Parochiam, quam possidet, cogitur interea temporis deserere, eamque Oeconomus, vel Vicario cuiquam veluti sponsam ignotis Custodibus relinquere, Sponso non parumper, sed diu sane abfuturo, dum neque implicita, ut fit, lite, terna etiam, vel quaterna, alia ex aliis examina super præstantia primum doctrinæ, tum deinde aliorum, quæ ad integrandam idoneitatem opportuna sunt, contentiose multiplicentur, et commode, ne dicam otiose, transigantur, antequam deliberari possit, utri concurrentium Parochia sit adjudicanda.

Ad tollendam ejusmodi non minus querelarum, quam incommodorum occasionem, Sac. Congreg. Concilii Tridentini interpres, postquam rem omnem a capite repetitam in gemina cessione prima Octobris, et 16 Novembris 1720 summo studio recognovit, tandem, Sanctissimo etiam annuente statuit (quod per præsentis Literas encyclicas exequitur) omnes, et singulos Episcopos, aliosque Prælatos, penes quos sit Jus, et auctoritas faciendi Concursum, hortari, ut examen ejusmodi instituere non graventur, quate jam, et multæ Dioceses, et Urbs ipsa observat, atque Apostolica etiam Dataria

postulat, sive cum, Sede vacante, vacat Ecclesia aliqua Parochialis, cujus collatio ad Sedem Apostolicam pertineat, sive cum vacat Parochialis aliqua, ut dicitur juxta decretum, sive demum cum vacante in Collegiatis, aut Cathedralibus Ecclesiis Dignitate aliqua majori, annexam habente curam animarum, faciendus est Concursus, atque ad Apostolicam Datariam transmittendus, ut notum est atque in literis, quæ de ordine Sanctissimi tunc e Dataria prodeunt, clare præscribitur.

Vacante itaque Ecclesia Parochiali, quæ conferenda sit per Concursum, atque hoc solitis formulis indicto, hæc, quæ sequuntur ex Sacræ Congregationis sententia, consilio, suasionem, servanda proponuntur.

Primum nempe, ut assignentur eadem omnibus Concurrentibus quæstiones, iidem casus, idemque textus Evangelii; super quo Sermonis aliquid præscribat ad probandam dicendi pro Concione facultatem.

Alterum, ut Casus, et Quæstiones resolvendæ dictentur omnibus pariter eodem tempore, atque omnibus pariter eodem tempore textus Evangelii tradatur.

Tertium, ut certum idemque omnibus spatium temporis constituatur, intra quod casus resolvant, Quæstionibus respondeant, Conciunculam component.

Quartum, ut eodem Concurrentes omnes in Conclavi claudantur, unde, quandiu scribent (dabitur enim omnibus scribendi copia) nemo eorum egredi, neque alius quisquam eo ingredi possit, nisi postquam scripta confecerint, et exhibuerint.

Quintum, ut omnes sua quisque manu tum responsa, tum sermonem scribant subscribantque.

Sextum, ut responsa quidem latine, sermo autem ea, qua ad populum haberi solet, lingua scribatur.

Postremum, ut unumquodque responsum, et unusquisque sermo, cum ab unoquoque Concurrentium exhibebitur, non solum ab eo, qui scripsit, atque a Cancellario Concursus, verum etiam ab Examinatoribus, et ab Ordinario vel ejus Vicario, qui concursui interfuerint, subscribatur.

Peracto secundum hanc formulam Concursu, collataque ei, qui magis idoneus, ac dignior judicatus fuerit, Ecclesia Parochialis, non admittatur Appellatio, aut a mala relatione Examinatorum, aut ab irrationabili iudicio Episcopi, nisi intra decem dies Collationis interponatur.

Si quis autem hoc infra spatium appellaverit, Actaque Concursus petat ad Judicem Appellationis trasferenda; mittantur vel Acta ipsa originalia Concursus clausa, et obsignata, vel certe unum aliquod authenticum eorum Exemplum a Cancellario Concursus, atque altero Notario collatum, et auscultatum coram Vicario, vel alio in Ecclesiastica Dignitate constituto; quem eligat Ordinarius, ad quem etiam Notarii Cancellario, adjungendi electio pertinebit, nec

non ab Examinatoribus Synodalibus, qui Concursui interfuerint, subscriptum.

Ex quibus actis, vel authentico eorum exemplo, nisi gravamen quoad doctrinam probet is, qui sic, ut præmittitur, examinatus aut a mala relatione Examinatorum, aut ab irrationabili iudicio Episcopi appellaverit, novum ad examen provocandi facultatem a Sacra Congregatione frustra postulabit.

Quemadmodum, et in iudicio appellationis persequi Jus suum frustra tentabit is, qui forte se gravatum doleat quoad reliqua, nisi interposita mature, ut dictum est, appellatione ab irrationabili iudicio Episcopi, gravamen quo ad illa ostenderit, vel ex actis primi Concursus, vel saltem ex attestacionibus, et documentis extrajudicialibus etiam, sed non levibus.

Atque ita quidem sensit Sac. Congregatio, et Sanctissimus assensit. At si quis tamen Ordinariorum aliter, ac supra descriptum est, Concurrentium examina instituere perrexit, perget et Sacra ipsa Congregatio more pristino Appellantibus, qui se gravatos dixerint, provocationem ad novum examen nulla gravaminis prævia probatione, indulgere. Interim tamen ne harum Literarum memoria dilabatur, vult eadem Sacra Congreg. eas in uniuersumque Ordinarii Cancellaria perpetuo conservari. Cujus interea consilium, et voluntatem dum ego omnibus significo, Amplitudini tuæ fausta omnia e Cælo precor. Romæ hac die 10 Januarii 1721.

Uti Frater.

P. M. Card. Corradinus Præfectus.

P. Lambertinus Secretarius.

(5. Quo ad concursum Parochialium attendenda est novissima Const. Bened. XIV. incip. *Cum illud*, in qua inter alia præscribit, quod Examinatores non solum attendant in concurrentibus Doctrinæ peritiæ, sed etiam inquirent, qui præ aliis ætate, prudentia, probitate morum, præstito antea Ecclesiæ servitio, cæterisque dotibus ad Officium Parochi cumulate obeundum necessariis, essent idonei, et commendabiles. Et ne ab Examinatoribus ignorari possint supradictæ qualitates, præcipit quod Concurrentes ante Concursum intra terminum ab Episcopo assignatum, coram Cancellario Episcopali, vel alteri ab episcopo deputando, suarum qualitatatum, meritorum et numerum probationes, attestaciones, tam judiciales, quam extrajudiciales, aliaque id genus documenta, quæ fraude vacent, exhibeant; alioquin dicto termino elapso, documenta hujusmodi quæcumque, et qualiacumque ea sint, nullatenus recipiantur. Et veniente die Concursus a Cancellario Episcopali singulorum merita, qualitates, et requisita (ut vocant) incorrupta fide deprompta a iuribus tempore habili exhibitis, in scriptis, summatim redigantur, et copia Episcopales tradatur non solum Episcopo, vel Vicario Generali vices illius obeunti, sed singillatim

omnibus Examinatoribus ad concursum adscitis, ut tum de scientia, tum de vita, moribus, aliisque regendæ Ecclesiæ necessariis dotibus ferant iudicium. Absoluto concursu, Notula compendiarum requisitorum antea distributa, tradatur Cancellario, qui illam comburat, vel penes Acta custodiat, et nemini ostendat, nisi de mandato Episcopi. Et demum circa Beneficia Sanctæ Sedi reservata, mandat quod ipsis vacantibus Concursus semper ab Episcopo indicatur, et absoluto Concursu, si res sit de Beneficiis Curatis, quæ tantum ratione Mensium reservata sint, Episcopus inter approbatos eligat magis idoneum, et Dataria significet, nec acta Concursus transmittat, nisi a Dataria, cum id opportunum duxerit requirantur. Sin vero dicta Beneficia quibus Cura imminet Animarum, ex alio quovis capite quam Mensium Apostolicorum S. Sedi reservata sint; Eo sane casu, veteri non immutato more, absteineat Episcopus a ferendo dignioris iudicio, et Acta Concursus ultro Dataria exhibeat. Licebit tamen Ordinariis pro suo arbitrio, familiaribus Literis Datario scriptis, eidem denunciare Personam, quam censent regendæ Ecclesiæ magis idoneam, eundemque commonere, an occulta aliqua, et in Actis juste relicta subsit causa, quæ cuiquam obstet ad Beneficium Curatum obtinendum.

ARTICULUS II.

Ad quem spectet edicere, ac facere concursum, et quinam debeant, et possint ad illum admitti.

(1. Concursum edicere spectat ad Episcopum, seu Ordinarium; Conc. Trid. d. sess. 24. cap. 18. de reform. S. Pius V. d. Const. incip. *In conferendis*; et pluries declaravit Sacra Congreg. Concil. ut infra patebit. (2. Episcopus tamen non potest solus facere Concursum, quando habet Vicarium Generalem sibi Roma missum, sed assistere debet etiam Vicarius, qui procurabit, ut omnia Canonice fiant; Sacra Congr. Concil. in *Narnien. 2. Octob. 1635.* (3. Et si Vicarius sit Apostolicus, ad ipsum solum, non ad Episcopum pertinet facere concursum, sicut et Synodum, et declarare magis idoneum, quia Episcopus non habet nisi administrationem Ordinis; Sacra Cong. Con. in *Lycien. 9. Junii 1608. et in Bisinianen. 16. Maii 1653.* (4. Immo si Episcopus reperiretur suspensus a Jurisdictione, et haberet præservatum Jus conferendi Beneficia, non posset ex approbatis in Concursu Parochialis digniorem præeligere; sed hoc Jus pertineret ad Vicarium Apostolicum, ut præter decreta, quæ referuntur a Fagnan. in cap. *Ille 2. Ne Sede vacante num. 30 et seqq.* nuper declaravit Sacra Congreg. Concil. in *Sorana 12 Decemb. 1699.* (5. Edicta pro Concursu habendo ad Parochiales vacantes, quarum collatio pertinet ad inferiores Prælatos, qui non habent Territorium distinctum, nec Jus congregandi Synodum, debent publicari ab Episcopo, in cujus Diocesi Parochialis existit, vel ab alio,

qui est vicinior, si sit Nullius, et coram eo Concursus fieri; et ad ipsum Episcopum ex dignis Digniore eligere, et inferiori Prælato pro collatione, seu institutione remittere spectat; Sacra Congreg. Concil. in *Palentin.* 24. Octobr. 1573. et in *Fofosempronien.* 2 Decembris. 1628. (6. Et Prælati inferior habita significatione, non poterit conferre alteri quam præelecto ab Episcopo, ut respondit Sacra Congreg. Concil. in *Burgi Sancti Sepulcri* 15 Decemb. 1696. ad tertium. (7. Abbas enim seu Commendatarius, vel alius Prælati Episcopo inferior, non potest Concursum, et examen instituere ad Parochiales existentes intra fines suæ Jurisdictionis, et collationis, quando non habet potestatem congregandi Synodum, et actu non congregat, sed hujusmodi Concursus, et examen spectat ad Episcopum, intra cujus Diocesis fines existit Abbas, seu Commendatarius, vel alius Prælati inferior; et si non constat intra cujus Diocesis fines existat, id spectat ad Episcopum vicinior; Sacra Congreg. Concil. in *Castri Durantis* 30. Aprilis 1611. (8. Abbates tamen, seu Commendatarii alique Prælati inferiores Episcopo, qui omnimodam habent Jurisdictionem quasi Episcopalem, nec alicui subsunt, sed sunt immediate subjecti Sedi Apostolicæ, quique nullius sunt Diocesis, sed proprium habent Territorium, si habeant jus congregandi Synodum, et legitime constet illam congregasse, et eligisse Examinatores, possunt Concursum instituere, examinare, approbare, omniaque alia facere, quæ continentur in Decreto Tridentini *sess. 24. cap. 18. de reformat.* Sacra Congreg. Concil. in *Fofosempronien.* 18. Martii 1591. in *Causa Abbatia Farfen.* ut refert ex Aldan. Barbosa in *Tridentin. loco citat. num. 51.* et sæpe alibi. (9. Et in specie pro Abbate Monasterii in Monte Cassino Ordinis S. Benedicti, quod nullius sit Diocesis, et nemini subsit, sed omnimodam Jurisdictionem Episcopalem, ac proprium Territorium, et Jus congregandi Synodum, ac ideo possit Concursum instituere, examinare, approbare, et OEconomum deputare, declaravit Sixtus V. 20. Februarii 1589, ut refert Tambur. *de Jur. Abbat. tom. 1. disput. 3. quest. 4. num. 2. ex venerabili Archivio Cassinensi.* Et novissime Benedictus XIII. Constitut. incip. *Quod inscrutabilis*, in qua confirmat etiam Constitutiones Sixti V. Urbani VIII. et Innocentii XI. ad id emanatas.

(10. Episcopus manutenendus est in sua quasi possessione instituendi Concursum, donec Prælati inferior coram Judice competente legitime probaverit jus cogendi Synodum habere, aliasque coegisse, in eaque Examinatores ad præscriptam Concilii formam deputasse; Sacra Congreg. Concil. 17. Januarii 1585. et 4. Augusti 1594. (11. Unde Episcopus Fofosempronien. ut vicinior manutenendus est in sua quasi possessione Concursum instituendi in vacationibus Ecclesiarum Parochialium della Ravignana, et Juris præeligendi magis idoneos ex approbatis in eisdem Concursibus, donec Abbas

Classen. legitime probaverit habere jus congregandi Synodum, aliasque coegisse, et in ea Examinatores ad præscriptum Concilii Tridentini, *sess. 24. cap. 18. de reformat.* deputasse; Sacra Congreg. Concil. in *Fofosempronien.* 2. Decemb. 1618. (12. Concursus qui in vacationibus Parochialium fieri solent coram Episcopo viciniori, si occasione pestis Civitas illius sit bannita, et aditus præclusus ad eundem Ordinarium vicinior, potest prorogari, ut concessit Sacra Congregatio facultatem Prælati inferiori prorogandi tempus concurrentium, et ut interim provideretur de OEconomis, et Vicariis idoneis; Sacra Congreg. Concil. in *Nullius Terræ Guastallæ, Parmens. Diocesis* 17. Augusti 1630. (13. Concursus edicta Ordinarii proponere debent in Beneficiis Curatis reservatis Sedi Apostolicæ vacantibus per obitum, puta in mensibus reservatis; et a Sede Apostolica provisio facienda est approbata ab Examinatoribus in Synodo Diocesana deputatis, si fidem approbationis habet ab Ordinario. Ita decisum fuisse a Sac. Congreg. refert Piasec. in *praxi Episcop. par. 2. cap. 20. n. 17.* Barbosa in *Tridentino loc. cit. n. 64.* (14. Episcopus instituens Concursum ad formam Concilii, non potest ut suspectus recusari, sed qui se existimaverint gravatos appellare poterunt a mala Ordinarii electione, seu iudicio ad effectum devolutivum, non suspensivum; Sacra Congreg. Conc. 28. Septemb. 1589. (15. Vicarius Generalis Episcopi potest, Episcopo impedito, proponere Edictum pro Concursu, et coram se examen indicere, textu expresso in Conc. Trid. *loco cit. ibi: Ab Episcopo, sive eo impedito, ab ejus Vicario Generali.* (16. Immo examen Concursus posse fieri coram Vicario Generali, etiam Episcopo non impedito, tenet Garcias de *Benefic. part. 9. c. 2. num. 119.* Barbosa de *potestat. Episcop. part. 3. alleg. 60. num. 41. et in Tridentin. sess. 24. c. 18. de reformat. n. 77.* et Massobrius *requisit. 3. dub. 3.* quia dicunt ipsi prædicta verba Concilii, *sive eo impedito*, sunt solum posita ad denotandum convenire, quod ab ipso Episcopo, cessante impedimento, fiat examen. (17. Quinimmo potest Vicarius Generalis proponere Edictum pro concursu, etiam si ipsemet velit examen subire, et Episcopus illi sit Ecclesiam ipsam vacantem collaturus. Sic decisum fuisse a Sacra Congreg. Concil. super *d. c. 18. sess. 24.* refert Sbroz. *de Offic. Vicarii in addit. q. 188. lib. 2.* (18. Sic etiam Vicarius Capitularis potest Concursum ad Parochiales vacantes tempore Sedis vacantis facere, ut poterat Episcopus, servata forma Sac. Concil. Trident. *sess. 24. cap. 18. de reformat.* et magis idoneum eligere, et approbationem ad Sanctissimum Dominum, ejusque Eminentissimum Cardinalem Datarium mittere pro confirmatione electionis. Ita declaravit Sacra Congregatio Episcoporum in *Ravennaten.* 3. Februarii 1624. et sæpe alibi. Tota enim jurisdictio Capituli Sede vacante ad Vicarium Capitularem devolvitur; Benedict. XIV. *De Synod. Diocesana l. 4. cap. 8. § 10.* et ad hoc juvat adducere id, quod a Sacra

Congregatione Concil. actum fuit de observandis in examinibus faciendis pro collatione Parochialium Sede Cathedrali vacante, et ita concepta fuit declarationum formula per manus transmissa, et a Sanctissimo approbata, ut refert Fagnan. *lib. 3. Decret. in cap. Illa 2. Ne Sede vacante num. 18. et seq.* et est ut sequitur.

(19. In primis Capitulum nullam sibi in hisce examinibus auctoritatem vindicabit, sed constituet Officiale, seu Vicarium infra octo dies post mortem Episcopi, prout mandat Concilium Tridentinum *sess. 20. cap. 16.* (20. Is Vicarius sic constitutus obibit illa omnia munia quæ Concilium *sess. 24. cap. 18.* statuit obeunda ab episcopo, seu ejus Vicario, cum Parochialis Ecclesiæ vacatio contigerit; et in specie statim habita notitia vacationis Ecclesiæ, et antequam ullum fiat examen, constituet idoneum in ea Vicarium cum congrua fructuum portionis assignatione, reservatis reliquis fructibus iis, quibus Jure videbitur. Hic autem Vicarius in Parochiali positus, ejus onera sustinebit, donec ei de Rectore provideatur. Postea per Edictum publicum vocabit omnes, qui voluerint examinari pro obtinenda Parochiali vacante. (21. Deinde examinabit eos, qui concurrerint, adhibitis etiam aliis Examinatoribus, saltem tribus, quorum votis, si paria aut singularia fuerint, accedere possit ipse Vicarius quibus magis ei videbitur. (22. Curabit idem Vicarius, ut singulis annis a Diocesana Synodo probentur Examinatores saltem sex, ex quibus tres ipse eliget, eosque congregabit, qui secum examen perficiant ad singulas Parochiales vacantes. Et si duo, vel unus tantum ex dictis Examinatoribus etiam cum Vicario, vel omnes tres, aut etiam sex absque Vicario se ipsos congregaverint, et examen perfecerint, nullum erit; et si ex dictis sex Examinatoribus aliqui intra annum suæ electionis mortui fuerint, tota facultas examinandi ad superstites, etiamsi unus tantum superesset, spectabit eo anno durante. Si contingat sequentibus annis nullos alios Examinatores eligi in Synodo Diocesana, illi sex qui semel præcedente anno ex Decreto Concilii fuerint electi, pro legitimis habeantur, etiam post lapsum annum suæ electionis, et sic in Officio suo perseverare possint, donec alii, servata forma Concilii, electi fuerint. Et si ex dictis sex Examinatoribus aliqui mortui fuerint, curabit Vicarius, ut lapso anno alii in locum demortuorum sufficiantur seu eligantur in Synodo Diocesana, alioquin qui supererunt pro legitimis non habeantur. (23. Examen, et approbatio pro legitimis non habeantur ad Parochialem vacantem, si ante ad alias Parochiales, quæ prius vacaverint, fuerint facta, ita ut non sufficiat aliquem judicatum fuisse idoneum præteritis mensibus, aut annis ad aliquas Parochiales; sed semper opus sit novo examine, et nova approbatione ad ipsam Parochialem, de cujus collatione singulis vicibus agitur. (24. Examinatores ex pluribus examinatis non unum solum, sed plures, quos judicaverint idoneos, signifi-

cabunt Vicario, et ex istis pluribus idoneis per Examinatores judicatis, non ipsi Examinatores, sed solus Vicarius eliget quem cæteris magis idoneum judicaverit. (25. Hæc enim facultas nullo modo Examinatoribus competit, cum soli Episcopo a Concilio sit attributa, cujus loco erit Vicarius Sede vacante. (26. Ipse enim solus Vicarius absque Examinatoribus scribet Literas ad Sanctissimum D. N. (27. Ad quem collatio Parochialis spectabit, quibus præcipue testabitur propositum fuisse Edictum, et examen per Concursum factum, totque examinatos fuisse, et ex examinatis tot idoneos a tribus saltem Examinatoribus judicatos, se vero ex istis idoneis talem cæteris magis idoneum judicasse elegerit.

(28. Capitulum, aut Decanus Cathedralis Ecclesiæ nullum sibi Jus vindicet proponendi Edictum, aut deputandi, seu eligendi, vel convocandi coram se Examinatores, nec jubendi aut curandi, ut coram se aut Examinatoribus deputatis ab eo, examen fiat; minus eligendi magis idoneum aut literas testimoniales de eo scribendi. Sed hæc omnia, ut supra dictum est, exequetur partim Synodus Diocesana, partim Vicarius Sede vacante constituendus, quem Capitulum omnino constituere debet ex dictis *sub num. 19.* (29. Multo magis idem Capitulum absteineat a conferendo Parochialem vacantem in Commendam temporalem ei, qui magis idoneus fuerit judicatus. (30. Maxime etiam caveat, ne concedat omnes fructus ipsius Parochialis eidem, dicta Commenda durante. (31. Quoniam Concilium hæc omnia prohibuit, dum statuit debere Episcopum, statim habita notitia vacationis Parochialis, idoneum in ea Vicarium cum congrua fructuum portione constituere, quod munus obibit, ut supra dictum est, Vicarius præcise, Sede vacante deputatus. Cavebitque et ipse a dicta Commenda, et a concessione omnium fructuum. (32. Et illud quoque sibi interdictum sciet, ne eum, quem magis idoneum ipse judicaverit, constituat Vicarium in Parochiali, aut ei quoquomodo præficiat, donec collatio fiat; sed debet omnino a principio vacationis, et antequam ullum examen fiat, constituere in ea alium Vicarium, qui Curam animarum interea gerat, donec Parochialis fuerit a Sede Apostolica magis idoneo collata. Hactenus Fagnan. *loco supracitato.*

(33. Ad Concursum Parochialium non tantum Diocesani, sed etiam exteri debent admitti, nisi adsit aliquod privilegium, quod Beneficia non conferantur exteris; *Est communis Doctorum*, et sic decisum fuisse a Sac. Congreg. Concil. refert. ex Nicol. Monacell. *tom. 1. tit. 5. for. mul. 20. num. 1.* (34. Ad Concursum debent admitti tam exteri, quam originarii, etiamsi habeant aliud Beneficium Curatum; Garcias de *Benef. p. 9. c. 2. n. 208. et 209.* Corrad. *praxi Beneficior. lib. 3. part. 4. num. 12.* Monacell. *loc. cit.* et alii passim. (35. Non enim potest Episcopus prohibere Curatis, ne accedant ad Concursum aliarum Parochialium; Sac. Congreg. Episcoporum. 29. August. 1591. apud Barbos. *de potest. Pa-*